

Regional News Unit AIR Aizawl
Monday, November 10, 2025

Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

- Naktuk zing dar 7 atanga Dampa assembly bial bye-election vote thlak tan tur atan silent period a in tan a, engtikawng maha vote zawn phal a ni tawh lo.
- Member 25 awmna Lai Autonomous District Council inthlan December ni 3-a vote thlak hun puan a nih hnuah political party-te'n candidate tur an la puang lo.
- Bihar assembly inthlan thawh hnihna neih tur atana campaign theih hun, nimin tlai dar 6-ah khan a tawp a, naktuk-ah vote thlak a ni ang.
- India leh Angola te chuan an thawhdunna tihngheh leh zual an remti.

<><><>

BYE-POLL CAMPAIGN ENDS

Naktuk zing dar 7 atanga Dampa assembly bial bye-election vote thlak tan tur atana campaign theih hun chu nimin tlai dar 4 khan a tawp a, silent period a in tan a, engtikawng maha vote zawn phal a ni tawh lo.

Dampa bial bye-election atana campaign theih hun tawp ni hi Pathianni a nih avangin he inthlan chuhtu candidate-te leh political party-te chuan Inrinni khan an campaign hi an khar fel a. Dampa bial chuanhnuiaia khaw lian ber West Phaileng leh chuanchunga khaw lian ber Reiek-ah te campaign kharna hun pui ber hi an hmang a. Hnam tlem zawk awmna khaw lian ber Silsury khua-ah pawh Inrinni leh Zirtawpni a campaign kharna hun hmangin khaw dang dangah pawh nimin khan hun hman a ni bawk a. Hei bakah hian Inrinni khan rorellai ZPM, Congress leh MNF-te chuan media kal tlanga Dampa bial mipuite vote tura ngenna atan Aizawlah chanchinbumite an kawm bawk a ni. Nimin tlai dar 4 atang khan vote zawn phal a nih tawh loh avangin 'silent period' an tih mai chu a intan a. Thawhle hni tlai lama vote thlak zawh a nih hma chuan engti kawng mah a vote zawn phal a ni tawh lo a ni.

He mi chungchangah hian Election Commission of India-in kaihhruaina a siam angin vote zawn khap a nih tawh bakah Dampa assembly bial pawn atanga campaign tur a kal, he biala vote nei si lo te chuan Dampa bial hi an chhuahsan tawh tur a ni a. Aurinna hman phal a ni tawh lova, District Magistrate in khapna thupek a chhuah chu zawm vek tur a ni. Eelectronic media/social media leh a tlukpui dangte'n inthlan kaihhnawih, mipui rilru sukthlek tidanglam thei thil te an chhuah phal a ni lova. Dan zawmlo te chu kum hnih thleng lungin tan emaw, pawisa chawi emaw, pawu chawi leh lungin tang tura hrem theih an ni ang.

Inthlan ni leh a hma Thawhtanni-a print media a political advertisement chhuah tur te chuan Media Certification & Monitoring Committee (MCMC)-te phalna an la tur a ni a. Candidate emaw Party tinin chi leh chi, sakhuana, hnam leh hnam inkar boruak tichhe thei lam hawiin engmah tih loh tur a ni a. Vote hmuh theihna turin chi leh chi inkar boruak tichhe thei zawngin engmah tih loh tur a ni bawk.

<><><>

MCC VIOLATION

Naktuk a Dampa biala bye-election lo awm tura vote an zawinna-ah chief minister Pu Lalduhoma, inthlan dan (election model code of conduct) bawhchhia a puhna hmasa zawk a insawifiahna chu Election Commission of India in a pawmsak lo.

Chief Electoral Officer (CEO) pisa atanga thudawn danin Election Commission hian chief minister-in West Phaileng leh Reiek a campaign-na a a thusawi, cheng vaibelchhe 770 senga khaw 15 chawm tur tuikhuah a tiam ni a sawi chungchanga insawifiah tura tihna chu ZPM president-in a chhang a. Hei hi zir chian a nih hnu-ah Election Commission thutlukna siam turin thawn thlak a ni a. Election Commission chuan ZPM president sawifiahna chu a hnawl a, Pu Lalduhoma'n inthlan campaign-na a a thusawi chu a dem thu a tarlang bawk a. ZPM party president chu an star campaigner zawng zawng an thusawi a fimkhur tawh tur leh Model Code of Conduct bawhchhe tawh lo tura hriattir vek turin a zilhhau a. Hremna lam pang erawh chu ECI hian a sawi ri lo a ni.

He tih lai hian MNF party legal board-in CEO hnena an thu thehluh, Pu Lalduhoma'n November ni 1-a Silsury khua vantlang inkhawm a chi leh chi inhuatna lam zawng a sawi ni a an puhna leh anni lam insawifiahna chu nimin khan ECI hnenah CEO pisa chuan a thawn dawn ni a hriat a ni a. Inrinni chawhnu lam khan an insawifiahna hi CEO pisa chuan a dawng ni-a thu dawn a ni. MNF legal board chuan Silsury khua-ah hian chief minister hian ram hruaitu hmasate chu Mizote leh Chakma-te inhuatna tur tuhtu-ah a puh niin an sawi a. MNF chu a hmingah Mizo hnam tan chauh a nih thu leh Chakma tana din a nih ve loh thu bakah ZPM chu Zoram a cheng zawng zawng huap a nih thu a sawi niin an puh bawk a ni.

<><><>

BYE-POLL PREP

Dampa bial by election naktuka a vote thlak tura inbuatsaihna-ah polling station hla zual 6 a inthlan buaipuitu tur (polling party) te chuan an duty na tur hmun an thleng a, vawiin hian a tam zawk an chhuak ve leh ang.

Dampa bial ah hian polling station 41 awmin chung zinga polling station 6 - Silsury khua a polling station 3, Zopui, Hnahva leh Lianbuang a duty tur polling official-te chu an kal chhuak a. Polling station dang 35 a duty turte chu vawiin hian inthlan buatsaihna bungraw famkim nen Mamit an chhuahsan thung ang.

Mamit Election Officer Pu Lalnunfela Chawngthu chuan Dampa bial bye-election a polling station hla zual 6 a inthlan buaipuitu tur (polling parties) te leh critical polling station 3 - Silsury 1, 2, 3 a venhimna lam a duty tur CAPF section 3 te chuan lirthei 18 hmangin nimin zing dar 9 khan an duty na hmun tur panin an chhuak a, polling station dang 35 a duty turte chu vawiin hian lirthei 39 hmangin an kal ve leh thung dawn a ni a ti.

Byte: Election officer Pu Lalnunfela Chawngthu.

Vawiin tlai-ah chuan polling party zawng zawng hian an duty-na tur awmna khua-ah theuh an thleng kim tawh ang a. Dampa bial bye-election atana inbuatsaihna-ah hian Inrinni khan general observer Pu M.T Reju kaihhruaina hnuai-ah inthlanna buaipuitu turPolling Personnel-te duty dan tur chu Mamit bawrhsap pisa-ah a hnahnung ber atan khawl hmanga thliarfel a ni a. Polling official-te tan nimin vek khan a vawi thumna leh tawp ber atan training buatsaih a zawhfel a ni tawh bawk. Hei bakah hian hemi hma lam hian inthlanna atana hman tur EVM leh VVPAT khawlte chu endik a, hman theih turin a khawl siamtu ECIL company mithiamte'n EVM leh VVPAT 82 ve ve chu an pawm fel vek a, hmun himah venhimna hnuai a dahfel a lo ni tawh bawk a ni.

Jt. chief electoral officer Pi Ethel Rothangpuii'n Akashvani News a hrilh danin polling station 41 zinga 40-ah hian webcasting tih vek a ni dawn a. Lirthei hmanga kal theih loh, ke chauhva thlen theih awm chhun Zopui polling station-ah chuan electric a la luh loh avangin inthlan vote thlak lai hi webcasting a tih ve theih dawn lohva, chuvangin video hmanga thlalak a ni mai dawn a ni.

Dampa bial ah hian hmeichhia vote nei mi 10,185 leh mipa vote nei mi 10,605 avaiin vote nei mi 20,790 an awm a. Polling station 41 zingah Silsury khaw chhunga polling station 3-te chu venhim ngai zual bik a puan a ni a, central armed police force (CAPF) section khat zelin venhim hna an thawk ang. Silsury khua hi Bangladesh ramri dep tak taka awm, ralthuam chi hrang hrang vawi engemawzat an lo man tawhna khua a nih bakah Bangladesh ramri hung an la zawh fel lohna lai a ni bawk a ni.

<><><>

LADC POLLS

Member 25 awmna Lai Autonomous District Council (LADC) inthlan atana December ni 3-a vote thlak turah Zirtawpni atang khan chuh tumte tana hming pekluh tan theih a ni chungin hming pelut an la awm lova, political party-te'n candidate tur an la puang lo bawk.

State election commissioner Dr. H. Lalthlanglana chuan December ni 3 a LADC inthlanna lo awm tur atan polling station 111 zingah venhim zual ngai polling station a awm loh thu a sawi a. Lirthei luh theih lohna, ke chauhva tlawh pawh theih polling station 4 bakah lawng hmang chauha kal pawh theih polling station pakhat a awm thu a sawi bawk. LADC inthlan lo awm tur atan hian returning officer 3 ruat an ni a. District Election Officer (DEO), Lawngtlai district bawrhsap ni bawk Pu Donny Lalruatsanga chuan LADC inthlan lo awm tura inpuahchahna hrang hranga mawhphur turin District Level Standing Committee (DLSC) a din a.

DEO chu chairman ni-in election officer chu member secretary a ni a. Member dangte chu returning officer leh nodal officer zawng zawng bakah CYLA, district MJA, LUP, MUP, LWA, MHIP, LSA leh political party district president theuhte an ni.

LADC inthlan lo awm turah hian vote nei mi 56,857 an awm mek a, an zinga 29,013 hi hmeichhia an ni a, mipa 27,844 an ni. polling station- a Vote awm tamna ber chu vote 1,189 awmna Pangkhua a ni a, polling station- a vote tlemna ber chu vote 1 chauh awmna Hmawngbuchhuah a ni.

Thu dawn danin Hmawngbuchhuah khua-ah hian Mizoram mi dik tak, India khua leh tui an awm meuh lova, draft electoral roll-ah vote nei pathum an awm lai-in khua leh tui an nihna finfiah theih loh an nih hlawm avangin vote nei pakhat chauh an awm ta a. He khua a awmte hi Myanmar a Rakhine state a chengte leh Chin state chhim lam Paletwa leh a chhehvel khua ami Myanmar rambuai avanga rawn tlanchhia deuh vek an ni a. A khaw thenawm amite chuan 'Zakhai' hnam an ti a, Kawl tawng an hmang a, Buddhist sakhaw bia vek an ni bawk a. Kum 2019 July thla khan Hmawngbuchhuah khua a raltlan awmte hi Myanmar a an khua a ralmuan tawh avangin district thuneitute leh Assam Rifles tangrualin mi 300 dawn an lo chhuahtir tawh a ni. State Election Commission chuan vote pakhat chauh nei awm ta chu a vote thlakna a thup theih dawn loh avangin ruahmanna hranpa an siamsak dawn niin an sawi.

Lawngtlai SP Pu PC Lalchunglura chuan LADC inthlanna lo awm turah hian polling station 111 zingah tun dinhmun ah polling station venhimna uluk ngai zual a awm loh thu a sawi a, thil duhawm lo thleng palh thei vengin venhimna lam thawktute chuan theihtawp an chhuah mek niin a sawi. DEO Pu Donny Lalruatsanga chuan inthlanna fel leh muanawm a awm theih nan Political Party, Kohhran, Tlawmngai pawl leh LADC mipui thawhpui ah sawmin, Election tuang taka neih a nihtheih nan mawhphurhna hrang hrang neite pawh theihtawp chhuahturin a ngen bawk.

LADC inthlan lo awm turah hian tun kar Zirtawpni khi chuh tumte tan hming pek luh hun tawp niin, December 3 ah vote thlak a ni anga, vote tlate hi December 9-ah chhiar a ni ang.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

BIHAR ELECTION

Bihar assembly inthlan thawh hnihna neih tur atana campaign theih hun, nimin tlai dar 6-ah khan a tawp a, naktuk-ah district 20 huamchhunga assembly bial 122-ah vote thlak a ni ang.

Campaign theih hun tawp dawn thlengin party tinte, thahnemngai lehzualin an campaign a, tangrual pawl lian pahnih, NDA leh Mahagath Bandhan-te chuan assembly bial hrang hrangah vantlang inkhawm an buatsaih a ni.

NDA lam atangin nimin khan BJP hruaitu Amit Shah, Rajnath Singh leh Shivraj Singh CHouhan te chuan hmun hrang hrangah campaign a nei a. JD(U) President leh Chief Minister Nitish Kumar, Uttar Pradesh Chief Minister Yogi Adityanath te pahwin bial hrang hrangah thu an sawi a ni. Congress hruaitu senior rahul Gandhi chuan Mahagathbandhan candidate te puala vantlang inkhawm buatsaihah hun a hmang a. RJD hruatiu Tejashwi Yadav pawhin hmun hrang hrangah thua sawi bawk a ni.

Bihar Assembly inthlan vote tla te hi tun thla ni 14 ah chhiar a ni ang.

<><><>

INDIA- ANGOLA

India leh Angola te chuan an thawhdunna tihngheh lehzual an remti. Nimin khan President Draupadi Murmu chuan Angola President Joao Lourenco hmu in hemi hnu hian inremn thuthlung ziah a ni a. Ram pahnihte hian fisheries, tuipui lama leilung hausakna leh in palai tawinna kawngah inremna thar an siam a. President Murmu i chuan Angola in International Big Cat Alliance (IBCA) leh Global Biofuels Alliance (GBA) zawm a remti chu lawmawm a tih thu a sawi a ni.

President Draupadi Murmu-i hian vawiinah Angola National Assembly ah thu a sawi dawn a. Angola-a India mi chengte nen hun an hmang ho bawk ang.

<><><>